

# Napoleon

## (1769–1821)

Confundatur da la Svizra d'oz

DA GUIU SOBIELA-CAANITZ

■ **Ils 15 d'avust 1769 ad Aiacciu/Ajaccio (Corsica) è naschi Napoleone Buonaparte, general da l'armada franzosa, dictatur e lur imperatur.** El ha influenzà il svilup da la Frantscha e da l'Europa.

Ins emblida savens ch'el ha marcà quel da la Svizra, cunzunt quel da plis chantuns, oravant tut en quels ch'el sez ha fundà, sco il Grischun. Las Trais Lias dal 18avel tschientaner dependevan cunzunt da l'Austria; il Grischun dal 19avel era cleramain svizzer. La midada provegniva da Napoleon, dictatur da la Frantscha da 1799 fin a 1814; quai pon ins leger en il chapitel intitulà «Revolution, Einheitsstaat, Föderalismus» (pp. 155–174) dal manual istoric da Thomas Maissen, dapi 2013 schef da l'Institut istoric tudestg a Paris\*.

### Mediatur da la confederaziun

Il settember 1802 han las armadas dal «Premier Consul» franzos occupà la Svizra. Quai ha inspirà al poet romantic englais William Wordsworth (1770–1850) ina poesia intitulada: «Thought of a Briton on the Subjugation of Switzerland» (p. 170). Maissen: «Napoleon aveva convocà ina radunanza consultativa (...).

El era persuadi ch'il centralissem na saja betg adattà al character svizzer. Da las discussiuns ch'el ha lura manà è naschida ina costituziun ch'el sez aveva per gronda part dictà, las 'Actas da mediaziun' che l'han dà il titel uffizial da 'Médiateur de la Confédération suisse' (...). I menziunavan expressivamain 'la restauraziun da la suveranità en ils chantuns' (...). Ins ha restabili ils tresdesch

chantuns sco avant 1798. Mo Berna ha pers il Vad e l'Argovia. Lezza han ins engrondi cun il contadi da Baden, (...) cun Mellingen, Bremgarten ed il Fricktal, possess da Habsburg enfin 1802 (...). Naschi è il chantun Son Gagl cun lezza citad, l'intschess dal prinzi-avat, (...) la vallada dal Rain songagliais, Sargans, il Gaster, Uznach e Rapperswil, sco era Sax [oz en la vischnanca da Sennwald] e Werdenberg [oz en la vischnanca da Grabs].

Il Grischun è s'unì definivamain cun la confederaziun (...). Ins ha reunì duravlamain en il chantun Tessin ils intschess a sid dal Gottard (...). Stein am Rhein è restà tar Schaffusa, ma ins ha stuì restituir Diessenhofen a la Turgovia (...).

Il Vad ha survegnì Avenches e Payerne (...). Ins ha integrà en ils chantuns las tschient claustras svizas secularisadas sco era las grondas d'Engelberg (en la Sutsilvania) e Nossadunnaun cun la venerabla citad libra da Gersau en il chantun da Sviz» (pp. 170–171). 1815 ha il congress da Vienna surpiglià tut quellas midadas da Napoleon; lez è pia stà in confundatur da la Svizra d'oz. En l'entir 19avel tschientaner hai lura dà mo ina midada: La separaziun da Basilea-Champagna (1833).

La victoria da la Dieta federala en la guerra dal Sonderbund 1847 n'ha manà nagina midada territoriala. La naschientscha dal chantun Giura 1978 na pertutgava nagina part da la Svizra da Napoleon, mabain l'intschess da l'anteriur prinzi-vestg da Basilea, attribui per gronda part a Berna dal congress da Vienna.

\* **Thomas Maissen, Geschichte der Schweiz, quarta ediziun curregida, ed. Hier + jetzt, Baden/AG, ISBN 978-3-03919174-1.**